



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7



Sorkari-i telungpur den
sensaksemdar: PM

Eastern Ladakh nung China
sepaitem aika lir: Gen. Naravane



VOL. XVIII NO. 351 (ADOK 351) DIMAPUR

AMUNGNÜ (SUNDAY) MONGPUTENI (OCTOBER) 03, 2021

₹ 5.00

COVID-19 Nagaland: 30 dak putet & 23 taneptsü angu

Kohima, October 2, 2021 (TYO): Nagaland nung Honibarnü nisung 30 dak COVID-19 aliba putetba züingsema nisung ajak agi 31,295 kümogo.

"Tanü nisung 30 dak putet. Parnokji Dimapur nung 20, Mokochung nung 4 aser Kohima o Phek nung asemsem (3) lir," ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

"Kasa mapang COVID-19 puteta alir nisung 23 taneptsü angu. Parnokji Dimapur nung 15, Phek nung 4, Kohima nung 3 aser Mokochung nung 1 lir" ta paisa ashi.

Nisung 31,295 nungi 29,277 taneptsü nguogo aser ibaji 93.55 lir, ta paisa shisem.

Tang nisung 352 anepaludar saka parnok rongnung nisung 272 dakbo shirangba yimya kecha mali, ta Dr Kikon-isa ashi.

"Hokolbar tashi nung nisung 689,777 nem COVID-19 vaccine indang dose 10,63,599 agütsüogo" ta State Immunization Officer, Dr Ritu Thurr-ia ashi.

"Vaccine agirtem frontline workers 60,936, healthcare workers 15,996, arishi küm 45 ser temapur 198,488 aser arishi küm 18 nungi 44 tsüingda alir 414,357 lir" ta paisa ashi.

Gandhi Jayanti nung pa tepsetsang Godse tushir

New Delhi, October 2, 2021 (Agencies): Honibarnü Mahatma Gandhi indang tasoba anogomong nung nisung aikati pa tepsetsang Nathuram Godse nem tetushi agütsüogo.

Twitter nung parnoki 'Nathuram Godse Zindabad' ta tweet asü.

Godse-i January 30, 1948 nung Mahatma Gandhi khaset saka BJP pusemertem mapang shia Godse nem tetushi agütsü arur.

BJP aser Sangh parivar tanishir temi teti Godse aser pai inyakba mapa pusema jembia arur aser item tatalokba aika nung BJP-i Godse tushirtem dang kecha meshii dang toktsüogo. Godse dang India nung mezüngbuba kiralongrar ta ajar.

Honibarnü BJP MP Varun Gandhi-ia Mahatma Gandhi tasoba anogo nung pa tepsetsang Nathuram Godse tushirtem aitsüogo.

"Parnoki linük maaksüdaksür anungji parnok tenüing yimyak nung metetdaksütsüla aser maaksüdaksütsüla" ta Varun-ia ashi.

"India ya teti tamangba yimsü tsütsü tashitait linük ka lir saka Mahatma ajanga asen linük tamangbaren ajungkettsü. Pa libaliro ajanga ibaji sayu aser tanü tashi pa tesayubatemji asen tashi lir. 'Godse zindabad' ta tweet asürtemi asen linük maaksüdaksür" ta Varun Gandhi-isa metetdaksü.

"Mahatma Gandhi aser pa tesayubatem atema alimai India akhümtsübur. 'Godse Zindabad' ta tweet asürtem yimyak nung maaksüdaksütsüla. Tali bilemloka aoertem nem linük nung tongti shilem magidaksütsüla" ta paisa ashi.

Honibarnü Congress-ia Nathuram Godse tushirtem aitsüogo.

Linük Tebu asoba anogo nung Nathuram Godse tushiba ya BJP sorkari yaria inyaker, ta Congress-ia ashi.

Gujarat nungi Congress lennir

Hardik Patel-i Varun Gandhi dang pelaba metetdaksü.

Paisa Twitter India aser Home Minister Amit Shah dang Mahatma Gandhi tepseter tushirtem merenshüsü takhangba agütsü.

"Iba ama osangtem tangsa noktangtsüla, account tem shibangtsütsüla aser Godse pusemertem anema FIR benoktsüla" ta Hardik Patel-i metetdaksü.

"Mahatma Gandhi anemertem aser pai inyakba mapa maginürtemi pa tepset. Tanü item tashi jagi sorkar yimsü asür aser Gandhi-i noktakba aser inyakba ajak samatsütsü meranger" ta Congress spokesperson Pawan Khera-ia ashi.

"Rashtriya Swayamsevak Sangh (RSS) indang tashishitsü aketba putiotsü otsü nung masks ajanga tongtipang shilem agir, kechiyong parnoki Sangh indang tejak chichiba nembanger" ta Khera-isa ashi.

Parnoki tebang agi Gandhi tushir saka parnok pusemertem dangbo Godse pusema nungittsü ayongzüker, ta paisa shisem.

"Alima ajungai Mahatma Gandhi tushia aser pa bilemtetdang, Godse sülen anidakertemi India nung social media nung pa nem tenüingsang agütsüba atema sasa bilemer" ta Congress spokesperson Supriya Shrinete-ia metetdaksü.

"Gandhi Jayanti nung Godse nem tenüingsang agütsür. Iba ya sorkar aser parnok züingsemtemi tesempatep adoktsü metsü prokba ajanga lir" ta laisa tai tonglokttsü.

"Linük tebu Mahatma Gandhi asoba anogomong nung 'Godsewadi' sorkar kübok kiralongrar 'Nathuram Godse Zindabad' yimiyim ayimba atema nüma matanger" ta Youth Congress president Srinivas B V-ia ashi.

"Prime Minister tebilemba ana yur mapa inyakba anenang. Tebang agibo Gandhi saka temolung nungbo Godse" ta Srinivas-ia ashi.

Assam-Nagaland arrtsü anasa prangpong-injang aika apu

Guwahati, October 2, 2021 (Agencies): Assam-Nagaland arrtsü anasa Karbi Anglong district nung police-i prangpong-injang aika ngutet aser iba dak sendakba nung nisung 5 puogo.

Karbi Anglong police aser Dimapur nung amenoka aliba 5 Assam Rifles-i Hokolbarnü Naharjan tesem nung Gypsy gari ka soter mita prangpong. Iba tesem ya Nagaland den arrtsü anasa lir aser idangji gari nung AK-56 Rifle 3 den injang round 75 aser pistol ka den

round 8 bena aliba angu.

Police-i gari nung mena alir nisung pungu apu. Parnokji Akhui Kashung, Ngmpoi, Wungreingam, Ashang Chithung aser Lanchungrei Kamei nungertem ta jangjaogo.

Iba dak sendakba nung Arms Act kübok ken o ka benokogo aser bushisingdang südar.

Taküm August nunga 5 Assam Rifle-i yaria Bokajan Police Station kübok Gharialdubi tesem nung .22 Rifle ka, Pistol 3 aser hand grenade 2 nguteta liasü.

Kohima nung 'no parking zone' anema lungkak aiter

Kohima, October 2, 2021 (TYO): Kohima District administration aser Smart City Development ktdangsurtemi New NST nungi Razhü Point adena Khuochiezhie (local ground) North Gate tashi 'no parking zone' akümba atema iba tesem nung shishilembartem tanü dokan melapoki lungkak aitogo.

Yashi Traders Road Business Association (TRBA) Kohima pur rongdak senden ka amendang iba telemtetba agia liasü.

September 26 nü Deputy Commissioner aser Kohima Regional Transport Authority chairman Gregory Thejawelle-i October 1, 2021 nungi "no parking zone" alitsü osang metetdaksa liasü.

Paisa loading aser unloading atema aonung 8:00 ako nungi 6:00 ako tashi mapang latettsü aser anepdang 6:00 ako nungi aonung 8:00 ako tashi on-street

parking masütsü tetuyuba agütsü.

"Iba tesem nung aliba shishilembartem temelenshi aginür saka ktdangsurtemi onok den masüingdangtepi no-parking zone alitsü telemtetba agi" ta TRBA ktdangpurtemi ashi.

New NST nungi Razhü point tashi Kohima Smart City kübok lir aser iba tenokdangba ajanga jila nung tesem ka nung shishilembaba dak kongshir, ta parnokisa metetdaksü.

"Kohima nung tesem ka dang masü saka Kohima Municipality kübok tanga tesemtem nunga temolung agütsütsü. Tanü onoki tejashi sayutsü atema dokantem shibang aser iba ya onok sasa molungteta inyak" ta TRBA ktdangpurtemisa ashi.

"October 1 nungi iba tenokdangba agütsüba ajanga bakery aser hotel tem nungbo mekongshi saka wholesalers aser tanga shishilembartem

takoksa kanga ajuruogo. Anogo nung Rs 60-70,000 tashi yokzükerteri Rs 20,000 teküpok dang yokzük" ta parnokisa ashi.

"Onoki ktdangsurtem den senden amentsü asüingdang saka ibaji magizüker. TRBA Kohima ktdangpurtem Kohima Chamber of Commerce and Industries (KCCI) züingsemtem lir aser onoki KCCI vice president den külemi Mongulbarnü Deputy Commissioner aser RTA chairman den ajurutepa shidi ka agütsüogo" ta TRBA-isa metetdaksü.

"Onoki Deputy Commissioner den KMC, Smart City ktdangsurtem aser Superintendent of Police den külem senden amentsü imlar, saka Hombar tashi nung telangzüba kecha melira onoki iba tesem nung garitem tashiyim agi anendaksütsü" ta parnokisa metetdaksüogo.

CEO Nagaland-i political party tem den senden amen

Dimapur, October 2, 2021 (TYO): Election Commission-i 58-Shamator Chessore (ST) Assembly Constituency by-election agütsü osang sangdongba sülen Chief Electoral Officer, Nagaland-i October 1, 2021 nü Political party ajak den senden ka menogo.

Senden nung CEO aser ktdangsurtemi by-election indang osang lemsatetep aser

candidate o political party temi inyaktsüba metetdaksü.

Election agütsü osang sangoktsüba sülen Tuensang district nung Model Code of Conduct (MCC) benokogo anungji ibaji by-election metembang tashi alitsü ta CEO-i ashi.

Senden nunga Election Expenditure Monitoring Process indang osang metetdaksüdag, Candidate temi Election

Expenditure indang osang magütsüra Representation of People Act, 1951 nung aliba ama disqualify asütsü ta CEO-isa metetdaksü.

Election mapang vote enoktsür nem sen, yi mesüra tanga rongsen agütsüba putetra Indian Penal Code aser Representation of People Act, 1951 kübok temerenshi alitsü, ta paisa shisem.

Dimapur DC office belenba anema Core Committee tentet

Dimapur, October 2, 2021 (TYO): Dimapur nung Deputy Commissioner indang Office belena meyoktsü atema October 1, 2021 nü Civil Society Organisations Core Committee ka tentetogo.

Tanü Core Committee senden ka amendang September 29, 2021 nü sangdong agütsüba

magizüktsü aser Principal Secretary, Home, Government of Nagaland-i September 7, 2021 nü tetuyuba agütsüba meyipa reprangshiang ta akhangtsü lemtet.

Nagaland sorkari October 4, 2021 tashi nung telangzüba kecha magütsüra October 10, 2021 nü lokti sentong ka alitsü

atema Core Committee-i telemtetba agiogo.

Iba sentongji anepdang 9:00 ako nungi City Tower junction nungi DC office tashi agütsü. Anungji Dimapur district nung alirtemi iba sentong nung yariteptsü mepishir, ta Media Cell, Core Committee, CSOs Dimapur sangdong ka nung metetdaksü.

AKTK Kaketshir Anogo den Lokti Senden agiogo

Dimapur, October 2, 2021 (TYO): October 2, 2021 nü Ao Kaketshir Telongjem Kohima (AKTK) pur Kaketshir Anogo den Lokti Senden agiogo.

"AKTK ya 1960 küm tenzüker aser iba mapang nungi tenzüker tesüiba küm 60 tsüingda tanishirtemi timtem tooshi jenti ajurua aruogo. Anungji tanü kaketshirtemia alizüing tuluba yur inyaktsü ayongzüker" ta Nagaland Legislative Assembly Speaker, Sharingain Longkumer-i jembidang ashi.

Tesüiba küm 60 tsüingda inyakshangshia aruba meyipa reprangra, kaketshirtemi tamasa typewriter amshi, iba sülen computer amshi aser tangbo mobile phone amshir. Iba ajanga alima ainba aser melenshiba samelur anungji asenoka iba temelenshi sülen anidaksüla, ta paisa ayongzüker.

"Mokochung district nung tazünger teimba lir saka azüingtsü-

zülotsü metetba ajanga nisung kaji tashitemtet makümer. Shisaliok ya anogoshi angazükba wadang ka lir anungji kaketshirtemi tamakok ajurutsü akok saka idakji tezü metangi pei kechi akümtsü alizüing yua lir ibaji atongtsü merangtsüla" ta Speaker Sharingain-isa metetdaksü.

Paisa kaketshirtem dang Nagaland dang masü saka linük tenzüksü atema alizüing ayutsü ayongzüker.

Ao Kaketshir Telongjem Kohima Senyur, Wati. L. Imchen-ia o jembidang kaketshirtem dang sobaliba maitsü nung temolung agütsütsü ayongzüker.

"Kaketshirtemi pei tetsü oshi

nung temolung agütsütsüla aser akokba tashi pei yimtsüng semdanga sobaliba, putiotsü aser kenten angazüktsüla" ta paisa ashi.

Wati. L. Imchen-isa tesentepertem dang arem shiruru aser süngdonglidong wazüka ayutsü ayongzüker.

Iba sentong nung Sharingain Longkumer-i 2020 aser 2021 HSLC aser HSSLC tatidangtem nung takok tajung anguba kaketshir 11 nem kulikaket agütsü.

Sentong nung mendenji Kilangungla Pongen liasü, AKTK tir Imodangba Imchen-i tesentepertem pelaa agizük aser Tatong Tir Kumtanzukba Jamir-i anküp tepela o jembia.

2021-2023 kümsük atema AKTK ktdangpurtem:

Tir	- Akumyanger
Tatong Tir	- Takusunep Imchen
Tongti tezülur	- Meyipong Kichu
Repssem zülur	- Tianungla Longchar
Senyur	- Er. L. Senti Jamir.

MLA Moatoshi-i farmers market semzüksü



MLA Moatoshi Longkumer, Deputy Commissioner, Dimapur Rajesh Soundararajan aser tangartem Indisen yimtsüng nung Farmers market lapokba sentong nung tangokba noksa nung angur.

Dimapur, Mongputeni/October 2 (TYO): Aluyimer aser lanur entrepreneurs tem ajungkettsü nükjidong nung MLA Moatoshi Longkumer-i Indisen yimtsüng nung Honibarnü farmers market ka semzüksüo.

Iba mapa atema Dimapur II, LADP nungi sen 49, 60000 aser Arogoi sen 30,36106 agütsü aser MLA Moatoshi Longkumer-i iba shishilembadak achaayanga asür nem taa agüja liasü.

Shishilembadak lapokba sentong nung Longkumer-i, shishilembadak amenokba nükjidongji lanur entrepreneur tem, aluyimertem aser tetsürtem ajungketa parnok yanglutetba

osetsüt balala ayoktsü atema lir. Iba ajanga tekübokba jenjang nung alirtem jenjang ajungkettsü aser rongsenketzünga tajungba akümtsü, ta ashi.

Indisen farmers market achaayangertem tayoker aser talirtem atema shishilembadak mereka toktsütsü merangtsü. Iba shishilembadak achayangertemisa digital weighing scale benoka ochimashi inyakyim ajak nokdangtsü.

Iba shishilembadak ya Deobarnü dak alaka hopta tepeyong lapoktsü. Shishilembadak nungi azükba ya Arogo senpongi aitsü aser shilem tilaka Village council dangi aotsü.

Assam nung shishilembatsü

melena, aser talisa temeshi amongnü raksaa Deobarnü shishilembatsü melena MLA-i nüburtem aser Khristan kaka ama peisasa angateta Honibarnü tashi nung pei nungdak shishiatoktsü ayongzüik.

Paisa, Dimapur nung aliba nüburtem ajak dang, pei kidang nungdak shishitsü atema Indisen nung shishilembadak semdangtsü mepeshi, kechiyong iba ajanga lanur entrepreneurs aser aluyimertem ajungkettsü aser medenser lokti rongsenketzünga tajungba akümtsü, ta ashi.

Iba sentong nung Deputy Commissioner, Dimapur Rajesh Soundararajan-i o jembia liasü.

Kitsubozou nung 51buba Panchayat Day mungogo

Kohima, Mongputeni/October 2 (TYO): October 2 nü Kitsubozou Panchayat, Kohima küm 51 ajungba benjungmung Panchayat Hall nung mungogo.

Sentong nung ojembiba mapang Kitsubozou Panchayat Chairman Vimhalie Pienyü-i, panchayat ktdangsurtem aser tetsür aser lanur lokti densema lokti tentet ajak dang kiyong temaba jenjangi ajungkettsü atema tangatetep nung amalitepa inyaktü ayongzüik.

Paisa, tetsürtem dang tetsü kaka ama tejakdang ser inyaktü aser lanurtem dang kiyong tongtoret ama inyaksangshitsü

ajungshi. Pienyü-isa, kiyong ajungkettsü atema bendanga agüja inyakba lenirtem aser mezümpurtem dang kanga pelaba lemsatep.

Kasa mapang nung Kitsubozou Panchayat general secretary Aziebu Theyo-i, 2020 küm October ita nungi tenzüka panchayat inyakyimtem metetdaksü aser senyur osang Neilie Aacha aser constitution committee osang convener Dr Asalie Khezhe-i agütsü.

Anganwadi, Health, Education, Sanitation aser Audit osangtema item lokti lenirtemi agüja liasü.

Sentong nungsa Kitsubozou Gaon Burah Vituozi Kire, tetsür lokti tentet tir Vevosalü Terhase aser lanur lokti tentet tir Ruokuozolie Pienyü nungeria tajungshi o jembia liasü.

Maneni sentong nung colony GB tasenba Medochülie Khezhe pelashishia agizük aser GB tejenba den tepila sentong agi.

51buba panchayat day ya Visakholie Zatsu lenisüba nung agi aser Pastoress Shalom CRC Kitsubozou Vetsüsolü Rose-i temaotsü meshizüka sarasadem. Maneni finance secretary Sarhünyü Shupao-i tepela anküp o jembia liasü.

MMC sanitation worker-tem REM teloki tetushi agütsü



REM 3rd Honorary Award sentong yangi MMC conference hall nung agir külen Mokokchung Municipal Council sanitation workers-tem den külemi tangokba noksa nung angur. Mokokchung, 2nd October 2021. (Photo Courtesy: Moasashi Jamir)

Mokokchung, 2 Oct (TYO): Royal Enfield bike amshir temulunger parnok 23 lungjemer tentetba The Royal Enfield Mokokchung (REM)-i 'Let's Go Clean' omen nung ajemdaker 3 buba tetushi agütsüba sentong ka Oct 2 nü yangi MMC conference hall nung ayongzüka kaogo. Taküm 2021 küm iba tetushiji MMC nung merükmejuba mapa inyakerem nem agütsü.

MMC Sanitation Workers-temi timtem jenti arema Mokokchung town merüka ayuba mapa (service) tajung

reprangteta taküm 2021 küm asoshi iba tetushi senpetji parnok nem agütsür, ta REM, tir Temjensubai metetdaksü.

Yaküm Mokokchung town ya temerüktiba town senpet agizüka lir, ibaji mamatoktsü aser Mokokchung nübur ajaki iba maparen nungji khuret bena pei shilem lir ta nenshitsu aser maneni Mokokchung town merükmejuba maparen nung shilem agitsü asoshi paisa ajungshia liasü.

REM-i merükmejuba tsütsü osang tajung

sangdongba den MMC nung inyakerem ajungshiba asoshi MMC ktdangsurtemi pelaba metetdaksü.

REM Honorary Award ya kümshia agütsüba sentong ka lir. Iba tetushi ya kija/telok shirnoki nübur/lokta ajangzüksü asoshi tangar dang nungi alakteta inyaker, parnok nem senpettsür. REM tenteter külen nungi parnok lokti asohi mapa tajung aika inyaka arudar, ibaji ngua 2021 Governor's Award atema nominate süa liasü.

PELABA LEMSATEPER



ASO: 1936

ASÜ:
26.09.2021

Onoki teti meima aliba ojala asür **Mrs. Tsüknungpokla** (Chuchuyimlang) la mapang talangka shiranga alidang nungi tenzüka tasünü tashi kinungertem, kiyongertem, yimtsüryimertem aser temeimertem ana aser talang nungi shirnoksa ozü den rongsen, nübu, shisatsü den sarasadem agi yaritepogo nenok ajak dangi iba osang kaket ajanga tepang agi rasa-a ashitsü makokba tepela lemsateper. Ozü-i nenok mepa yari meyipa agütsütsü maka saka Tulusang Tsüngremi nenok ajak moajangma.

- Temeim Chirnur, Semchirtem aser Kinungertem.

Nagaland sorkari Durga Puja atema tetuyuba agütsü

Kohima, Mongputeni/October 2 (TYO): Nagaland sorkari containment zone tem tema nung puja pandals amenoktsü melaba den state nung taruba Durga Puja benjungmong atema tetuyuba agütsüo.

Principal Secretary (Home) Abhijit Sinha-i Hokolbarnü tetuyuba agütsüba nung ashiba agi, Durga Puja benjung amungba mapang, kümshia Nagaland kübok aser talisa Dimapur nung tekülemdak (mandirs) aser nüburtem aliba tesemtem nung pandal tem amenoker. Iba amala pandal tem nung nüburtem aika adenshir ta shia pai, COVID-19 wara mesüshi aliba temulungdang yur taruba Durga Puja amungba mapang tashidak menatepa aoba nokdangtsü atema jenjang tapet agitsü kanga nungdaker, ta ashi.

Tekülemertem pandal tem anepdang 5:00 ako nungi aonung 9:00 ako tashi semdangtetsü, ta paisa ashi.

Sentong ayongertem densema mapang ka nung puja pandal tem nung nisung shilem 50 dang inyaksangshitsüla aser iba den masks asemba aser tetsügang ita inyaksangshiba amala COVID-19 dak sendakba yimyayimpong tapet benoka inyaksangshitsüla, ta Sinha-i ashi.

Sorkarisa puja sentong ayongertem dang puja amungba telungi masak masemertem aser teka merukmeju mesüi maitdaksütsü tetuyuba agütsüo. Iba den puja ayongertem dang kikümbang nung hand washing/sanitization atema facility anepalutsütsü metetdaksü.

Maneni sentong ayongertem dang nüburtem tetsügang ita inyaksangshidaksütsü atema kima nüburtem tarensena nokdaksü atema temaitsü toktsütsü aser item inyakyimtem shidak benoka inyaksangshitsü atema police tem nem teyari agütsütsü asoshi volunteer aser private security anisemtsü metetdaksü.

Sorkarisa puja metenzük

tsüngda aser shibanger külen pandal temeket merektetsü aser anogo tom nunga ghonda 6 tetsügang iter puja amungba tesem merekteta alitsü metetdaksüo.

Puja amungba tesem semdangertem ajak puja ayongertem thermal acan asütsüla aser COVID-19 tashidak keta aliba temaitsü sayurtem shinga puja pandal temi maitdaksütsüla. Puja pandal semdangertem kar dak danga COVID-19 tashidak keta aliba temaitsü sayur puja ayongertem sorkar medical facility nem osang agütsütsü aser item nisungang medical facility bushi anir aotsü atema anepalutsütsü nungdaker, ta kasa sangdong ajanga metetdaksü.

Arishi küm 65 temapur, arishi küm 10 tekübok pur, tanga tashidak keta alirtem aser mashisa aliba tetsürtem dang puja pandal tem mesemdangtsü atema metetdaksüo.

Maneni sorkari, süngyanlu intoki aoba mapang nisung 50 dak tali maotsü aser mapang ajak nung COVID-19 dak sendakba yimyayimpong shidak benoka inyaksangshitsü metetdaksü.

Puja committees/organizers tem nem pandal amenoktsü atema district nung ktdangsurtem nem temelaba agütsütsü atema tashi agüja aruogo saka tensa apir Deputy Commissioner tekolak ser District Task Force (DTFs) nem iba tashi agütsüo.

DTF tem dang puja ayongertem den angatettepa süngyanlu intokba mapang nisung nongtepba nungi jenbotsü atema jenjang tapet agitsü metetdaksüo.

Sorkarisa district commissioner of police aser superintendent of police tem dang security, traffic atema jenjang tapet agitsü metetdaksüo.

Tetuyuba agütsür aliba sülen manidakra puja committee/organizer mesera aibelenertem temzüng ozüing dak ajemdaker merenshitsu, ta Sinha-i ashi.

Metongshitsür

Dimapur, Mongputeni/October 2 (TYO): October 2 nü osang kaket nung adokba osang "LTM 43-buba Lokti Senden takok ngua agiogo" nung onük

jembir Supongnenba ta aliba ya Subonenba Longkumer, Director CEC, Dimapur ta metongshia züngdaksüner.

Nisung 100 temai EMAA Cyclothon 2.0 nung shilem agi



Guwahati nung Cyclothon 2.0- India on the Move tongti tesemdanger Debojit Saikia (tiyongtsü) aser Event Management Association of Assam president Manash Kr. Sharma (achiji) na angur.

Guwahati nung nisung 100 temai EMAA Cyclothon 2.0 nung shilem agi

Guwahati, October 2, 2021 (Agencies): Guwahati nung Gandhi Jayanti amongdang Event Management Association of Assam (EMAA)-i Cyclothon 2.0 - India on the Move ayongzüka agidang nisung 100 temai shilem agiogo.

Iba sentong ya nübertem dang outdoor activities nung shilem agitsü aser cycle anishitsü yimya sübatsü tayongzüka agütsütsü atema agi.

Event & Entertainment As-

sociation (EMEA) India-i Cyclothon ya 2020 nung tenzüik.

Honibarnü iba sentong ya Guwahati, Ajmer, Bengaluru, Bhubaneswar, Chandigarh, Chennai, Coimbatore, Delhi, Goa, Hyderabad, Jaipur, Jodhpur, Kanyakumari, Kochi, Kolkata, Kota, Lucknow, Madurai, Mumbai, Puducherry, Trivathurum, Udaipur, Vijaywada, Vizag aser Warangal nung ayonga agiogo.

Guwahati nung tanep 6:30 ako nung Advocate General of Assam, Debojit Saikia-i Cyclothon 2.0 - India on the

Move tenzüiktsü.

Iba mapang Event Management Association of Assam president Manash Kr. Sharma aser socialite & entrepreneur Raghav Chada na liasü.

"Iba sentong nung cycle anishitsü jangrar nisung 100 temai shilem agiogo" ta EMAA president Manash Kr. Sharma-i ashi.

Iba sentong nung Sohum Emporia, Indian Red Cross Society, Page3 DJ Academy, Makhn Bhog, Streamy, HMV studio aser Rotary Club of Guwahati Luit teloktemi yaritep.

Taoba Meghalaya CM Mukul -i pa pusemer den ajurutep

Guwahati, October 2, 2021 (Agencies):

Taoba Meghalaya Chief Minister Mukul Sangma-i Trinamool Congress (TMC) nung adentsü akok ta jembiba mapang ka tanü pai pa pusemertem den ajurutepogo.

Pai mezüng ajuruteptsü saka telemtetba kecha magi lir ta Mukul-i ashi.

"Shibai nenok dang iba osang ashi? Telemtetba kecha magi nung nenoki kechiba denogo ta jembir" ta taoba Meghalaya chief minister Mukul Sangma-i ashi.

Mukul-i Hokolbarnü pa pusemertem ajurutep ta osang ka ajanga ashi.

Taküm September ita Mukul Sangma-i anaben tashi Delhi-i ao saka pai party high command den majuruteptet ta Congress lennir kati ashi.

Osang angazükba agi Prashant Kishor'er teloki TMC tenüng nung Mukul den jembiteper.

Meghalaya Congress President inyaktsü atema Congress MP Vincent Pala shimba nung Mukul Sangma mepelar ta osang ajanga ashi.

NLFT (PD) züngsem 4 temai adok

Agartala, October 2, 2021 (Agencies): NLFT (PD) züngsem pezüi prangpong-injang bener Tripura police tsüngdang temai adok.

NLFT (PD) zügsemtemji-Doberam Reang (47), Sailendra Reang (22), Samprai Debbarma (46) aser Subhalal Tripura (22) nungertem lir.

Par pezüi Bangladesh kübok Jupui NLFT (PD) tesep toktsür jena aru aser Hokolbarnü Special Branch tsüngdang temai adok.

Parnoki revolver ka (US-

made), factory-made gun ka, Chinese grenade ka, injang pezü, tashiyim agi sen meshiba shidi 3 aser 800 Bangladeshi Taka bener arua agütsü.

Parnoki 2019 küm NLFT (PD) nung züngsem aküm. Bangladesh nung NLFT (PD) teseptem nung tang senotsü agi kanga timtemer ta police-i ashi.

September 15 nü NLFT (PD) züngsem 3-Alindra Reang (25), Anida Reang (35) aser Draw Kumar Reang (30) nungertem temai adoka liasü.

Bus lendong nung tasü mang 2 ngutet

Guwahati, October 2, 2021 (Agencies): Meghalaya kübok East Garo Hills district nung bus tsükokba lendong nung samar bushiba nisung ana temang Hokolbarnü angu.

Tena züngsema iba lendong nung asür ajak agi 8 kümogo.

Brihostibarnü West Garo Hills district kübok Tura nungi Shillong-i aoba Meghalaya Transport Corporation (MTC)

bus gari ka tsükok.

Bus gariji Nongchram nung Ringdi ayong nung tsükok aser iba anogo nungsa tasü mang 6 tashi nguteta liasü.

Iba night service bus nung nisung 24 mena liasü aser ana samar bushitepa arudang yashi tena indang mang angu. Iba lendong nung nisung 16 yiru aser parnokji Shillong nung mozü ki ka nung anepaludar.



Gandhi Jayanti nung Assam sorkari Mission Basundhara tenzüiktsüba sentong nung agiba noksa angur. Sorkari election nung lisopurtem ali temeten kümzüka ayutsü nangzüka ama Mission Basundhara tenzüikogo. Iba nung non-cadastral villages survey asütsü, cadastral villages ajak re-survey asütsü aser land records digitisation asütsü. (Guwahati, October 2)

Department of Tourism
Govt. of Nagaland
presents




Enchanting Nagaland 2021

Photography Competition

An online competition for the best images linked with stories and Tourist sites (Heritage, Historical or purely based on Natural Beauty) with potential for creation of Tourist destination

2 winners per District

INR 25,000/- per winner

Winning candidates will be selected on the following basis:

- Fulfillment of criteria
- Feasibility of the project location

Last date of submission: 16th Oct, 2021

Registration forms and details of the competition will be available for download on our website

www.tourism.nagaland.gov.in

All entries are to be submitted to the email provided below

Contact details: +91-9863813283

Email: nagalandtourism2014@gmail.com



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI(OCTOBER) 03, 2021

Temulungjang temerük

Asenok jembishinü aser yimyayimpong agi asenok mulungjang s a y u r . Tetezü, asen mulungjang mesüra mulungsentsü memerüki tamajung dang bilema lira, asenoki tangar daka tamajung dang reperangtetsü. Ibayongji, Yisui asenok dang Luke 6:42 nung asenok tenük nung aliba anak tama endoker külenang tangar tenük nung aliba anak repringtsü ajungshia lir. Atangji asenoki tenük agi angur saka asen mulungjang nung kechi bilemer iba amaji dang asenoki repringtetsü. Aji oda, asenok mulungjang memerüki lira, asenok tenük agi tangar dak tajung aliba merepringtetsü. Ajisüaka, kodang asen mulungjang merüka lidir asenoki tangar dak tajung aliba repringtetsü aser tangar indang tamajung mebilemtsü. Tenyar Paul-i pa den külemi Tsüngremer wadang nung temulung ka ser inyaksang Tita dangi züluba shiti nung, " Temulungsentsü merüka alirtem atema ajak temerük asütsü saka temulungsentsü memerüker aser mamangba purtem tsüngdang ajak memerük asütsü, kechiyong parnok shisatsü aser temulungjang memerük lir," ta Tita 1:15 nung shia angutsü. Kodang, asenok mulungjang nung tajung bilemer asenoki tangar anema mebiler aser tangari tamajung bilemyonga asenoki item tamajung melena tajung agütsütetter. Tangar majung masukba aser tangar nungsen mejembiba tebang temeliji shisatsü temerük adenba purtem dak keta lir. Item jagi tangar tai mapur saka kechi tajung aji repringa tenüngsang agütsür. Iba jagi adianu aser medemertem rongnung teputep adoker. Shisa tajung aser temulung temerük nungi temeim adoker aser tangar asoshi tayari aser temoatsü angudak taküm ka akümer. Aji oda, Mathi tapu 6:22 nung Yisui asenok dang angatetdaksünüba o tongtibang kaji ,asenoki tangar dak tamajung ajitetra asenok pelaa malitsü aser iba mepelabaji tulu asütsü saka asenoki tangar dak tajung ajitetra asenok kanga pelaa alitsü ta shia lir. Aji oda, asenok libaliro nung asenok tamangertem asoshi tongtibang kaji, asenok temulungjang aser shisatsü merükmerüka alitsüba ya lir. Asenok shisatsü memerüki lira asenoki angashiba kecha nunga tajung mangatetsü aser shinga daka temulung malemtsü. Tanübo asenoki asenoksasa asenok mulungjang ken meyipa repringdangdi. Asenoki tangar indang tamajung bilemer asü ? Tangar dakbo tamajung-tamajung dang repringtetter asü ? Nai tangari inyakba mapa ajak nung aija anidaker asü ? Iba ama shisatsü agi na mepelateti lira, tang nai Tsüngrem dang nü mulungjang, nü mulungsentsü aser nü shisatsü ajak merüktetjang ta shiang. Nai Tsüngrem nem nü mulungjang tejenbaji agüjang aser aji tasen temerük ka agi melenjang ta shiang. Nai ochi mulung agi, tang Tsüngrem dang shisatsü tajung adenba temulungjang temerük ka aginer ta shira, Pai nü nem iba temulungjang temerükji agütsütsü aser tanü nungi na pelaa alitsü. Ibaji na asoshi shi atema mozü tajungtiba aser tanüla asoshi tekümtet jenjang tulutiba angur asütsü.

OLEMSABANG

Tanü lokti temelenshi bener aruba nung pei-lokti jenjang repringdangba
(Introspection in bringing about a social change today)

- S. Temjen Imchen, Jorhat, Assam

Okila:-

Tanü asen putu tensa nung Covid-19 wara ajanga, alima rangpen nung, lokti, kija aser kibong nung temelenshi balaka bener arutsuogo! Iba indang anogo-shi asenoki kilong nung, lokti ajak nung jembir aser taneptsü lenmang bushiteper! Ajidang masü, asen meimchir temang anepaluba yimya (all-round healthcare system) nunga temelenshi tulu ka bener arutsuogo. Saka, iba temelenshiba nungji, meimchir timtim-toushi aser tasüba jenti ajuru-yonga odagi. Iba wara tesashi ya kodang-ang anentsüar ashitsü makok. Kesa mapang nungjisa alima aser lokti tulu-tila ajak nung corona wara mapang aser ano post-corona wara sülen kechi inyaksü ta shisatokden electronic media sabang balala namely: TV channel, webinar, WhatsApp group, Facebook ajanga shilem jenti agiba angur. Item sabangtem nung jembiba nukjidongji kodusür asen lokti takutsüngsen (social rejuvenation) bener arutsü ibaji ka lir! Terajemba nung angatetsü mechinung asen Aor lokti nunga nukjidong tajung yur shisadanger aser inyaksu mulungteter ibaji tatsü agi repringdangdi. Temelenshi asoshi kechisa lemsatepdir mesüra jembidir, ibaji tajung. Saka, kechi onüktemsa jembidir jembiang, ibaji ochi mulungsentsu agi, asen telongjemba aser terenlok nung aotsü nukjidong yur lemteptsula aser yamaji inyaksu junger ta bilemer. Electronic aser social media sabang balala nung teintetbor telok, lanu-asensor telok aser lokti tentet balalai asen lima nung temelenshi ka bener arutsü mechi nung meranga inyaktepba indangji ken repringdangdi aser nisung shia shilem kechi, ibaji tatsü agi shisadngdi.

Electronic media nung lanurtem aser tainbor sensaksem akaba nukjidong

Lockdown mapang nung television (tv) channel, Facebook group, Webinar, WhatsApp amala nung telok-telok tenteta alima nung temelenshi bener arutsütsüba indang onük jenti lemsatepba angur. Alima aser lokti osangtsüsang angudak sabang (social media) nung o-lemsatep akaba nukjidongji corona wara aser lockdown-i bener arutsüba temelenshi balaka indang jembir. Yimya agi, micro-social media platform/WhatsApp telok ka nung züngsem 10, 20, 50, 100, 200 aser iba tema agi tenteta amshir. Ni-a iba ama lokti ishinaka ka nung tena lir. Ano, asenok Aor züngsem dang aliba teloka jenti lir. Iba nungji tener anogoshi alima nung tatalokba otsü, kiji-kina, kiyonger, kinunger, aser medemertem osang yak-yakta agitepa aoer. Social media nung anguba osangtem den, ano maneni anogoshia mesüra mapang aben, iba sabang nung onir-i tongtipang onük ka-ka benoka o lemsateper. Iba social media telok ya 2020 national lockdown mapang nungi tenzük aser tang tashi aoer. Iba sabang nung tashi-temeteter aika lir: secular teachers and theological educators, journalist züngsem tajung ka-ana jika, yimten-yimli lenir kar, mungdang aser arogo nung tenzük, missionaries and freelance evangelists, mungdang aser arogo tenzükba mapa nungi sodi agir alirtem (retired persons), item amala nubor densema anogoshia züngsem kari/onir-i benokba onük ajakji tatsü-talang ajakji jangratema o-katüper/lemsateper. Iba Whatsapp group nungji tongtipang telok ana tena lir. Itemji: lanu-asensor telok (youthful members) aser tainbor telok (seniors). Tatsü agi iba telok ana indang ji ajidangdi.

Lanu-asensor teloki social media nung lokti temelenshi indang lemsateper

Tanü asen chirnurtem - talisa lanu asensortem lokti osangtsüsang angudak sabang (social media) nung mapang timba indokba angur aser jembir. Lanurtem group discussion koba social media sabang nung agir ibaji group analytical approach tsütsü nungi angatetsü meranger. Social media impact indang before covid-19 tensa nunga tebilemtsü ka amai jembiba aru. Jebnüa alidang maoktsü ama, covid-01 aser covid-02 jagi social media platform amshibaji 'new normal' yimya ka amai kümdaktsüogo. Idakji mapa tajung aser tamajunga lir sudi. Tajungji ya - school aser college student ajak online-class iba sabang ajanga agir. Iba nung assignment/homework kaketshiri inyakbaji information technology (IT) madak tongtipang terenlok akaba kaji asütsü. Tesayurtem-ia computer aser Whatsapp anapronglaji evaluation mapa atema amshir. Asenoki dang social media-nung mapang shitak amshitetra, information technology ajanga lockdown mapang tajangzük tulu bener arutsüba asenok tenuk kuli. Joko, IT terenlok aser electronic gadgets mekai asenok taküm melitetsü sudi. Kopika yamai aotsü asenoki tang, tangbo meshitet! Saka, kümdanga lia asen taküm kümzüksüla! Asenoki metet, IT terenlok nungi social media platform balalatemji sentaka lir. Ibaji majung ta meshitetsu! Saka ya shiteter - mapang esap mesüi amshiba ibaji tai!!! Asenoki ibaji meteta lir asen anosa asen chirnur aser lanurtem dang sayu-bentsu asütsü asenok tsürabor aser tesayur shilem sudi.

Iba putu tensa asen lanur-asensor telok dak aketba yimya aser jaklaliro tajung kaji ya lir - kechi osang ngudir aser onük jembidir, parnoki yak-yakta dang lokti sabang nung lemsateper. Asen chirnur aser lanurtemji takotet tazünger tasa. Social media ji ajaki amshir. Talisa, high school nungi tenzük college students tashi; Government officials, tesayurtem, Govt servants, doctor aser nurse tem, sepoytem, NGO staffs, frontline workers, common citizens, item telok ajaki pei nungdak nung amshir. Tanübo phonecall masü, Whatsapp messaging ang tekaratiba aser temelaba amai amshir. Ibaji cost-effective aser kanga tezüba.

Lanur-asensor rogo nungi tazüngertemji Graduate nungi tenzük, post-graduate aser doctorate degree holder tem tesa lir. Parnokji secular teachers, laishir-rogo, arogo nung tenzük, free-lance missionary aser evangelist-tem, theological educators, aser item mesükba nübortem. Item lanu-asensor telok dak aketba yimya tajung ainaka lir. Lanurtemji temulung aser shisatsü teindang aser tesadem (straightforward and open-minded); parnoki metet asen Ao kinji tashi-temetet, meranga inyakba aser yimlibilema aser taochi sayutetba kin ta bilemer; asen Ao kin ji telongjem aser terenlok nung aoba kin ta metet; asen nubor ji sobaliba nung kanga takang; pei-pur bendanger madak aser bendang lima nung mapa inyaker mesüli tazünger asüyonga kanga keta sentepa-yaritepa liteper. Kong lidir liang, lanurtemi longjema dang alir aser linur!Ano külen, kodangsa o-lemsapang nung atenshia o lemsatepdir, parnok timbakati shilem agir. Shisatokden mapang nung jembiba onuktem itemi lir: Covid-wara indang; iba alima rangpen wara sülen kechi inyaksüla; clean-election campaign; Nagaland state nung ochimashi mapa inyakba (corruption); Ao Baptist Arogo Mungdang (ABAM) i lokti aser sorkar yariba maparen; Arogo inyakyim; Baptist tamangba temzüng aser maparen; pastor aser co-pastor koma inyaker iba indang; pastor itasen; tangar aser aseni Tsüngremer tenyaba mapa koma inyaker, item onuktem benoka iba sabang nung sensaksem tajung akar. Aiben o jembirtemji theological educators tem asür. Ano secular professor temia jembir. Iba sabang nung o jembirji aiben international aser national level nung nungtoko laiputishir aser shisashirtem, aser voluntary organization/ NGOs nung inyakeritemi jembidaktur.

(Maneni asung adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

OLONG PAITEP # 5953

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPILEN		LANGTSÜNGLEN	
1. Inyaker ajangetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Repranzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5954 TELANGZÜBA

LANGTSÜNGLEN :	LANGTSÜNGLEN :
1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.	1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

KOMA SÜLA TELANGZÜBA

Q. Nagaland nung kechà telokia menokdangi gari totzü bushia atsütetba mapatem tenzükdaksü nunga koma süla ?

Tarutsü anogotem nung natural disaster tesashi earthquake aser volcano amala nungi kümzüksü aser Naga nunger rongsen nunga ajangzüksü atema Gari totzüji kechia menongnangi pushia atsütetdaksütsüla. Saka tang Putu nung yabo Naga nung lennir yimsüsürtem tia reprangdangra ano kangasa metemsü amai arentaka bilemtsür.

- WhatsApp

"Alima rara tasembubaji totzü mechi nung adoktsü" ta temeteteri ashir. Tetzü totzü ya koda tongtipang. Anungji asen lima nunga kecha telokia menokdangi totzü ya atsüa rongsen kütsüng ajungkettsüla

- WhatsApp

Minerals kechisa Nagaland nung adoker ajak dang India küpok alidang, Rongsen aser nübu akadang Agreement tajung yanglua Industries tarutsü rongsen ketsüng asoshi tenokdangba kecha mali tenzüksüla. Iba Jagi dang pie lima jenjang metettsü.

-TPZ

Nagaland nung gari totzü bushia atsütetba tesemtem küm aika mapa meinyakteti shibanga lir, Anungji koma süla mapä kuma inyaktet nungbo onsara a ajungtsü. Ajisuaka item mapaji tenzüka meinyaktang tamasa mapa kechia teinyak majung amzüker telok ajak ya tenarong jakdakjang aser tenük pokdakjang ta Naga nunger tanur tain ajagi Tsüngrem tang sarasademtsüla.

-Ns jr

TANÜBO NAI LANGZÜANG

Q. Koba Railway station ya solar energy nungi power shilem 100% angur.

- A. Dr. MG Ramachandran railroad station
- B. Guindy Railroad station
- C. Abohar Railroad Station
- D. Achalda Railroad Station

(Taruba adok nung onoki langzüksü)

YASHI ADOK TELANGZÜBA : Aditya-L1

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimym

Lakzü

(v) tetsür temang mazüangi akümba mapang chiyongtsü mechinüi akümba

(Loss of appetite during pregnancy, uneasiness)

* Tetsür mashisa akümdang **lakzür**.

Lala

(v) tashi mait, sükdangtsü amai (weak)

* Au zünü kanga **lalaba** agi yipru mopung metizüker.

Happy Birthday

TENÜNG : WALUNIR LONGCHAR (AOSENDEN VILLAGE)

Tasoba : 3rd oct
Küm : 4 years old boy

Talidak : Dimapur padumphkuri

Na küm pezü tashi anir aruba ya Tsüngrem tenüng asanger ano arishi talang moajangma amen

- Temeim OBU, Otsü, Aunty Asen, Ako Arem and Ako merang & family's (Ajungla) changdang.



TENÜNG - MOLUNGTI PONGEN

Tasoba - 3 October, 2013

Küm - 8

Class - 2

School - Care Well School, Dimapur

Talidak - H No 103, Kashiram, Dimapur

Küm 8 tashi, Tsüngremer temoatsü nung taküm nungdak ajak tajungtiba agütsü nung, teyanglur tenüng asanger. Maneni anema aliba taküm arishi talang, Tsüngrem akümtsübuba nung, kaket shisatsü, takok tulu ngudakjang ta sarasademer.

Temiem, Apa, Mummy, Lydia, Otsu, Oko Jilo, Monglong aser Agusa.



SUDOKU # 5996

TELANGZUBA # 5995

			9	8		2		1		5	6	9	3	2	8	7	4	1
5		8			6	3	9			8	3	7	4	1	5	2	9	6
7	9		3			8				2	4	1	7	6	9	5	3	8
9				1			5			1	9	3	6	4	7	8	2	5
	3		8	4	2		1	9		6	8	2	9	5	1	4	7	3
2	1		7	5	9	6		8		4	7	5	8	3	2	1	6	9
4	7	9						3		3	5	6	1	7	4	9	8	2
	5			9						9	2	4	5	8	6	3	1	7
		2	5		8	9	4			7	1	8	2	9	3	6	5	4

OJANG LUTEP # 5541

MATA	:	<input type="text"/>
TÜTSAZÜ	:	<input type="text"/>
MAATE	:	<input type="text"/>
ASMÜ	:	<input type="text"/>
AKSA	:	<input type="text"/>
ANETLA	:	<input type="text"/>
AKAJ	:	<input type="text"/>
GIA	:	<input type="text"/>
TNGRESÜM	:	<input type="text"/>
EMKÜLANG	:	<input type="text"/>

OJANG LUTEP TELANGZÜBA # 5540

KECHI TENSA AJURUJAR ASENI METETA MALI ANUNGJI TETI RENEMA ALITSÜLA

TAN HOPTA ATEMA - KOMA SÜLA ?

Q. Nagaland nung yimtsüngtem kübok aliba ali kimongtem ya bank nung talang yutsür (mortgage) sen aputettsüsa ozüng tasen ka yanglu nunga koma süla ?

Olong 20 shi nung October 08, 2021 tashi nung iba telangzuba ya onok dangi (e-mail - tiryimym@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzubatemi taruba Honibarnü adoktsütsü.



October 02, 2021 nü New Delhi nungi video conferencing ajanga Jal Jeevan Mission App aser Rashtriya Jal Jeevan Kosh tenzüksüba sentong nung Ato kilonser, Narendra Modi-i jembiba noksa nung angur.

Modi-i Mahatma aser Shastri na nem akhüm agütsü

New Delhi, October 02 (Agencies): Honibarnü Mahatma Gandhi sor küm 152 ajungba anogomong nung Ato kilonser, Narendra Modi-i, pa taküm aser pa tangatbatem ajanga putu ajak nung nisungtem ajungmesotsü, ta shia akhüm agütsü.

"Gandhi Jayanti anogomong nung ni pa (Mahatma) nem akhüm agütsür. Pa tangatbatem/tesayubatemji alima den kanga puteper aser pa tangatbatem ajanga nisung million aika nem tashi

agütsür," ta paisa metetdaksü.

Ato kilonserisa India nung Ato kilonser tanabuba inyaksang, Lal Bahadur Shastri sor küm 117 ajungba anogomong nung asür nem akhüm agütsü. Modi-i twitter ajanga, tangatetba tajung nung pai taküm litetba ajanga senso ajak ajungshitsü, ta metetdaksü.

Ato kilonseri Mahatma Gandhi memorial Raj Ghat aser Shastri memorial Vijay Ghat semdanga lenir ana nem akhüm agütsü.

Honibarnü Raj Ghat nung yimsü balala nungi lenirtem adenshia sentong ka agi aser Mahatma Gandhi-i sabuba tekülem kentem tema liasü.

Shastri ya 1904 küm October 2 nü Uttar Pradesh kübok Mughalsarai district nung aso. Pai pa lanur asüdüng nungi Indian National Movement nung dena yimtenren nung ajemoka liasü aser 1947 küm August 15 nü Police & Transport Minister tenanzükba agi aser 1964 küm Ato kilonser aküm.

Eastern Ladakh nung China sepaitem aika lir: Gen. Naravane

New Delhi, October 02 (Agencies): Chief of Army Staff Gen MM Naravane-i Eastern Ladakh nung sepaitem terenemshiba jenjang asadanga forward areas aika semdangogo.

Hokolbar aser Honibar na arrtsülen forward areas semdangba sülen MM Naravane-i, China nungeri Line of Actual Control (LAC) nung kiojen aika yangluogo saka tensa balala atema India nung sepaitem renema dang lir, ta metetdaksü.

Osangbener den jembidang pai, "Sepaitem tali yoktsü atema China-i kiojen aika yangluogo. Onoki iba tensa mita atadar. Onok ket nung raraba hadir tajung lir aser tensa ajak ajurutsüsa onok tashi itta lir aser renema lir," ta metetdaksü.

August ita nung India aser

China sepaitem senden mena Gogra point nung linük anaprongla nungi sepaitem ainshiba sülen tang Army Territory tensa asadanga liasü.

"Jenjang ajak nung ken o jembidar. Tang tashi nung senden 12 ben menogo aser kobi melii ano senden amentsü imlar," ta pai metetdaksü.

"Hot Springs aser Depsang den Demchok areas nungia sepaitem ainshitsü atema tekaraba nung o lemteptsü," ta paisa metetdaksü.

Sepai tongti ketdangsertemi Gen Naravane nem region nung tensa osang tejangja metetdakja liasü, ta ketdangsertemi metetdaksü.

Mezüng anogo nung Gen Naravane-i Rezang-La area aser war-memorial ka semdanga linük atema taküm tenla agütsür sepaitem nem akhüm agütsü liasü.

Paisa Ladakh nung Lieutenant Governor, Radha Krishna Mathur ajurua Union Territory tensa asadanga liasü.

Yaküm May 5 nü mezüng India aser China sepaitem tsüngda Pangong lake area nung raraba sülen tensa mejungi aküm saka linük anaprong nungi ketdangsertem aser sepai lenirtem senden aiben mena arudang tensa süngjem.

Ken o jembiba sülen linük anaprongla nungi sepai meyirjang aika LoC nungi ainshigo aser taoba ita Gogra area nungibo sepai ajak ainshigo.

Taküm February ita nunga Pangong awatsüng tip anatsülen nungi linük ana sepaitem ainshia liasü. Tang Line of Actual Control (LAC) nung India aser China sepaitem 50,000-60,000 shi lir.

India nung ano nisung 24,354 dak Covid putet aser 234 asü

New Delhi, October 02 (Agencies): India nung ano nisung 24,354 dak coronavirus putet aser tang tashi nungbo linük nung nisung ajak senteper 3,37,91,061 dak iba tashidak putetogo, ta Honibarnü Union health ministry-i metetdaksü.

Tang linük nung coronavirus agi teshirangdakpur 2,73,889 dang kümogo aser tesüiba ghonda 24 tsüngda coronavirus agi shiranger 234 asüba densemabo linük nung iba tashidak agi shiranger 4,48,573 süogo, ta Health Ministry-i metetdaksü.

Honibarnü Union health minister, Mansukh Mandaviya-i, tang tashi nung India nung coronavirus vaccine dose crore 90 dak tema agütsüogo, ta metetdaksü.

Taküm January 16 nü India

nung coronavirus vaccination drive tenzuka liasü aser mezüngbuba shilem nung healthcare workers (HCWs) nem vaccine agütsü; iba sülen February 2 nungi frontline workers (FLWs) nem agütsü liasü.

Health minister-i twitter ajanga, "Shastri-i 'Jai Jawan - Jai Kisan' yimiyim agütsü liasü. Atal (AB Vajpayee)-i 'Jai Vigyan' bendenlok aser PM @Narendra Modi-i 'Jai Anusandhan' yimiyim agütsü, aser tanübo anusandhanji corona vaccine lir. #JaiAnusandhan," ta metetdaksü.

Ano March 1 nungi tenzuka arrshi küm 60 ser temapurtem aser co-morbidities keta alir arrshi küm 45 ser temapurtem nem vaccine agütsü tenzuka liasü. April 1 nungi tenzuka arrshi küm 45 ser temapurtem nem agütsü aser tesüsa May 1 nungi arrshi küm 18 ser temapurtem nem vaccine agütsü arudar.



Congress Tir, Sonia Gandhi aser Congress lenir, Tajdar Babar na tangokba noksa tejen ka yangi angur. Congress lenir Tajdar Honibarnü (October 1) alima nungi pilaogo.

Yaküm India nung anogo shia tanur anema inyakba tatalokba 350 liasü

New Delhi, October 02 (Agencies): NCRB data nung ajemdaker melungtet telok kati, yaküm India nung tanurtem anema inyakba ken o 1,28,531 liasü aser ibaji anogo shia tanurtem anema inyakba ken o 350 aliba den kasa, ta metetdaksü.

2019 küm National Crime Records Bureau (NCRB) report den medemdangra 2020 küm nungbo tanurtem anema inyakba ken o shilem 13.3 agi tajemba liasü, ta melungtet telok- Child Rights and You (CRY)-i metetdaksü.

2019 küm tanurtem anema inyakba ken o 1,48,185 liasü; iba tetezü 2019 küm nungbo India nung anogo shia tanurtem anema inyakba tatalokba 400 dak tema liasü.

"Tanurtem anema inyakba tatalokba ajema kümogo, ajisüaka anojungi tanur kibong kümdaktsübabo shilem 50 agi timba kümogo aser online ajanga tanurtem anema inyakba shilem 400 agi timba kümogo," ta CRY telokisa metetdaksü.

State sasep nung tanurtem

anema inyakba shilem 13.2 Madhya Pradesh nung liasü, Uttar Pradesh nung shilem 11.8, Maharashtra nung 11.1, West Bengal nung 7.9 aser Bihar nung shilem 5.1 liasü, aser linük nung tanurtem anema inyakba ken o shilem 50 shi (49.3) bo item states nungjagi lir," ta CRY-i metetdaksü.

Director, Policy Research and Advocacy, CRY, Priti Mahara-i, "Lendong/wara mapang nung teti agia tanurtem kümzükbaba jenjang tamajungba akümer.

Coronavirus wara mapang school tem shibangba, wara nokdangtsü atema senzüsemping nokdangba aser shishilembaba nokdangba ajanga libaluru aser rongsenkettsüng kongshiba den külemi timtemer kibongtem chiyungtsü agi anünga liasü," ta metetdaksü.

"Anungji ibaji ajanga tanurtem nem mapa tasak inyakdaksüba, tanur kibong kümdaktsüba aser tanur shibelenba kanga ataloka liasü," ta laisa metetdaksü.



October 02, 2021 nü Rajghat, New Delhi nung linük Tir, Ram Nath Kovind-i Mahatma Gandhi asoba anogomong nung Gandhi nem akhüm agütsüba noksa nung angur.

Sorkari-i telungpur den sensaksemdar: PM



Islamabad, Mongputeni/October 2 (Agencies): Pakistan Ato Kilonser Imran Khan-i, par sorkari Afghanistan nung Taliban teyari agia telongjem atema tenokdangba agütsür aliba Tehreek-i-Taliban Pakistan (TTP) telungpurtem den sensaksemdar, ta ashi.

TTP dang Pakistani Taliban ta ajar aser item teloktem nem tenokdangba agütsür lir. Item teloktem ya Afghanistan aser Pakistan arrtsü nung inyaksangshir. Parnok yagi Afghan nunger litsü nung amenoker Pakistan nung tesem balala maka arudar.

Osang ajanga ashiba agi, August ita linük amokbangba sülen Afghan Taliban puri TTP telungpur kar chiokogo, kong commander Maulvi Faqir

Mohammad densema lir. Turkey sorkar meyong TRT World news channel den sensaksemba mapang Khan-i, TTP nung telok balala lir aser telok kari yimjung atema Pakistan den sensaksemner, ta ashiba Dawn News sangdong ka ajanga metetdaksü.

"Onok tang parnok den telongjem atema sensak tesemdak lir," ta Ato Kilonseri ashi. Sorkari telungpurtem dang prangbong toktsür bendanga agütsütsü asü ta asüngdangba mapang pai, "hau, onoki parnok nem tatok agütsütsü aser parnok tanga lisopur ama dang akümtsü," ta ashi. Sorkar den sensak sema aliba mapang TTP-i kechiba Pakistan security forces

amaker ta asüngdangba mapang Khan-i, iba ya parok aliba jangjadaktsütsü atema dang lir ta langzüba den "onok tsüngda tangatetep ka dangi marutsü akok saka onok sensak semdar," ta Khan-i shisem.

TTP aser Pakistan na tsüngda apulatsür ama Afghan Taliban-i inyaksangshir asü, ta asüngdangba mapang PM-i, "sensaksem Afghanistan nung agidar asüning iba dak ajemdaker telangzübaji hau asütsü," ta ashi.

Taliban-i August ita Afghanistan ajunga atsünyonga ao tenzük aser linük nung yimti aser jila tongtibangtem timba parnok tazüokba küboki ait aser August 15 nü linük yimtiba Kabul-a parnoki amokbang. Taliban-isa September 6 nü parnoki Panjshir atsüngogo ta ashi.

September ita tetenzüklen tir Arif Alvi-i Pakistan sorkar dang TTP züngsem shirnok azütokshiba nung pilaa lir aser prangbong hadir toktsür Pakistan temzüng ozüng kübok anidaktsü mulunga agizükogo parnok nem taitok agütsütsü shidangogo. Iba amla inyakyim ajanga linük nung yimjung bener arutsür, ta tir-isa ashi.

Philippine tir Duterte yimden yimsüsüba nungi anener



Manila, Mongputeni/October 2 (Agencies): Philippine tir Rodrigo Duterte-i, pa taruba küm tatong tir atema tokteptsü sentong lir tang sangdonger aliba nungi atsünginer aser pa term tembangba sülen yimden yimsüsüba nungi anentsü ta sangdongogo.

Duterte-i iba telemtetba agiba ya Honibarnü sangdonga liasü. Pai pa nem mapang talangka teyari agüja arusang Senator Bong Go meiner oa Elections centre nung Commission ka nung tatong tir menden atema pa indang candidacy file sūdaksüba sülen iba osang sangdonga liasü.

Philippine nung temzüng ozüng ajanga tir ka küm trok

dang tir mapa abentsü melar aser Duterte anemertemi ashiba agi, pai tatong tir menden atema tokteptsü sangdongba ya Supreme Court nung ken o benoka ashishitsü ta shir liasü.

Duterte-i 2016 küm tir mapa agizük aser iba sülen ozüng alime temesepba mozü shibelenertem raktok tenzük. Iba sentong benoka inyakba mapang nisung 6,000 dak tali asü aser iba ajanga anüolen aliba linüktem aser human rights teloktemi ola adok tenzük. Item nisungtem tepsetba ken o ya International Criminal Court-i tang bushisüngdang tesüdak lir.

La Palma nung alirtem dang ki toktsür maotsü tuyu

La Palma, Mongputeni/October 2 (Agencies): La Palma asetkong nung volcano pokteta adokba ajanga mopung kanga menena akümba sülen ketdangsurtemi iba tesem nung alirtem dang kilung nungi kimai matoktsü tetuyuba agütsüogo.

Emergency services-i Hokolbar aonung Los Llanos de Aridane aser El Paso nung alirtem nem iba tetuyuba agüja liasü. Volcano pokteta adokba ajanga iba jila ana tamajungtiba kongshir lir.

Emergency services-isa, iba tenokdangba agütsüba ajanga jila nung alir nisung 3,500 shi dak kongshio, ta ashi.

Volcano pokteta adokba ajanga kongshir alirtem dang parnok ki kishi aser kichiba shibanga ayutsü aser kima nungi mopung temenen aiba nokdangtsü atema heating aser air conditioning disconnect asütsü tetuyuba agütsüogo.

San Borondon, Marina Alta, Marina Baja aser La

Condesa nunga tenokdangba agütsür lir.

September 19 nü nungi Cumbre Vieja volcano pokteta adok tenzükba sülen nisung 6,000 shi pei talidak kidang nungi aninogo.

Iba asetkong nung ki 800 dak tema raksaogo, kong nütsünyongsük 83,000 shi lir.

Hokolbarnü lava tapok tasen ka nung ayim tenzükogo, koba Canaries Volcanology Institute-i ano volcano tasen pokteta adoktsüba temaitsü lir, ta ashi.

North Korea-i Anti Aircraft missile ka tendangogo

Seoul, Mongputeni/October 2 (Agencies): North Korea-i, Brehostibarnü anti-aircraft missile tasen ka tendangogo, ta state media KCNA sangdong ka ajanga metetdaksü. United States den denuclearization dak sendakba nung sensaksem bangdaker aliba mapang NK-i tawa missile telongjunga tendanga arudar.

Mongolbarnü hypersonic missile ka tendangba sülen iba hopta kija nunga alimai meteta North Korea-i missile ana tendangogo. NK-isa tawa ballistic missile tem aser cruise missile ka tendangogo.

North nung tawa missile tem tendangba indang sensaksemtsü atema UN Security Council Hokolbarnü senden ka menogo aser Washington-i ashiba agi, parnoki missile tendangba asadangdar.

Tang missile tem tendangba ajanga North Korea-i tanem tanemi sophisticated weapons tem tali yangluba sayur aser iba ajanga nuclear hadirtem toktsütsü melena US-i parnok nem tenokdangba agütsür aliba agindaktsütsü atema parnok jenjang junga kümdaktsür.

Iba missile nung twin rudder control aser double impulse flight engine amala technologies tongtibang tasen bendenloka lir, ta KCNA sangdong ajangsa metetdaksü.

Kasa mapang nung South

Korea indang military-i ashiba agi, KCNA osang jangjatsü atema kanga junga asadangshitsü nüngdaker.

Missile tendangba sentong nung North Korea lenir Kim Jong Un maden saka Workers' Party züngsem Pak Jong Chon dena liasü.

North Korea-i taoba hopta ishika tsüngda, tanga linüktem ama parnoka linük defence tashi ita kümdaktsütsü atema parnoki hadirtem tendanger ta ashiba den United States aser South Korea nati parnok anema inyakba aitsü. NK-isa, sensaksem atema benokdangba den külem parnoki magizüksetba policy tem benokba den ashikelak maparen balala inyakba atema U.S. tir Joe Biden indang administration aitsüogo.

South Korean tir Moon Jae-in-i Hokolbarnü 73buba Armed Forces Day amungba mapang North Korea metetshi saka yimjung atema inyaktsü pa bendanga agütsür lir saka nüburtem taküm amokmerenba inyakyim anema telangzüba tesashi agütsütsü ta ashi.

Maneni Biden administration-ia, North Korea anema inyaktsü atema kecha tebilemba mali ta ashiba den denuclearization ken o bangdaka aliba tenzükshitsü atema parnoki benokdangba agizüktsü ayongzük.



October 1 nü Sale, Morocco nung school tenzükba sülen kaketshirtem mask semer class nung adenba noksa nung angur. Morocco nung 2021-2022 atema Hokolbarnü school tenzükba sülen kaketshirtem class-i ao tenzükogo.



October 2, 2021 nū Hotel Saramati, Supermarket nung Dimapur Molungyimsentsūr Telongjem (DMT)-i ayongzūkba shisatokden sentong nung adenertem külemi agiba noksa angur. Iba sentong ya "Putu Den Apet Tetsūr Ka" omen nung ajemdaker agi aser shisalen sayurtemji Mezüng Nagatsūr Ola Mission, Molungyimsen Missionary, Mrs. Temsula Lemtur, Pro Vice Chancellor, Nagaland University Prof. Alemienla aser Dimapur Government College Assistant Professor, Amongla Aier nungertem liasü. (Dimapur, October 2)

Advisor Medo Yhokha-i Capi Krotho ki semzüksü

Kohima, Mongputeni/October 2 (TYO): Advisor for Technical Education and Election, Medo Yhokha-i tanü Kitsubozou colony, Kohima nung Capi Krotho Dzevi Ki (welfare building) semzüksügo.

Capi Krotho ya mapa nungi anener aliba Angami nung Dobashis (DBs) tem indang lokti tentet ka lir. Tanü semzüksüba ki nung library tila ka lir, kong sobaliba ozüngtem tem indang aser Angami nung aliba Northern, Southern, Western aser Chakhro tesemtem nungi sobaliba nüngtem yua lir.

Capi Krotho ketdangsurtemi ashiba agi, Angami nung aliba tesemtem nungi sobaliba ozüngtem aser sobaliba

inyakyimtem bendena library nung ayutsü.

Sentong nung o jembiba mapang Advisor Yhokha-i, tetsü tebu mapang nungi benshia aruba sobaliba aser inyakyimtem tanem tanemai sama odar ta shia, item inyakyim aser sobalibatam wazüka, taruba putu nem belenzüka toktsütsü kanga tongtibang ta ashi.

Sobaliba aser inyakyim ya nisung ka aser kin ka maitsü lir, aser asenoki ibaji kodanga samaa modaktsüsüla, ta shia pai, sobaliba ozüng aser inyakyimtem bendena wazüka ayutsü asoshi Capi Krotho-i merangdangba ajanga lanurtem nem dang teyari agütsütsü masü saka bushisüngdangertem nem Angami

nunger sobaliba angatetsü atema teyari agütsütsü, ta Yhokha-i ashi.

Sentong nungsa NPF MLA Keneizhakho Nakhro-i o tatsüka jembiba mapang, Capi Krotho-i Angami nung aliba tesem pezü nungi sobaliba aser inyakyimtem wazüka ayutsü merangba atema parnok nem tenüngsang agütsü. Paisa iba mapa tajung atema teyari agütsütsü nangzüka liasü.

Maneni sentong nung Visesie Pier-i tir o jembiba aser Medongulie Rutsa lenisüba nung iba sentong agi. Sentong ya Kedolie Vithuo-i sarasadmer tenzük aser Neisazhünuo Rutsa sobaliba ken ka aten. Capi Krotho senyur Keneizezo Yiese-i ki yangluba osang agütsü aser Khrunyü Rino-i tepela anküp o jembiba liasü.

TEPELA LEMSATEPER



1925 – 25.09.2021

La lenmangtem jangratemtsü lenmangtem lir, aser la lenmang ajak tesünep lir. Apijemtsü 3:17

Onoki teti meima aliba Ojala **ASÜR ALEMENLA** (Chuchuyimlang) asükhü mapang Kija, Kibong, Arogo, Kionger, Yimten, Bendang balala aser Lokti balala shirnokisa sarasadem, nübo, rongsen aser shisatsü agi onok yariogo nenok mapa tajung asoshi nenok ajak dang belaba lemsateper.

Onok tashi agi meyiba agütsütsü kecha maka saka tajungasang asen tebu Tsüngremi nenok mapa tajung asoshi moajang ta onok tamang aser sarasadem.

Temeim Chirnur, Semchirsemnur Anükapang aser kinunger

GOVERNMENT OF NAGALAND DIRECTORATE OF TOURISM NAGALAND: KOHIMA

NO.TOUR (F&F)-40/ 2021/

//

Dated Kohima 2nd Oct, 2021

NOTIFICATION

1. The Department of Tourism is hosting International Tourism Mart from 28th November -30th November, 2021 at Naga Heritage Village , Kisama: Kohima for which there is requirement of good condition vehicles preferably Sedan Cars to attend to the delegates and may be extended till Hornbill Festival. Interested applicants/stakeholders willing to rent out Private Vehicles for the Event may submit their application on or before 18th October ,2021 with supporting documents to the office of the undersign.

Photocopy of Documents:

1. Vehicle Registration
2. Vehicle Insurance & Pollution Certificate
3. Driver's Residential Proof
4. Driving License.

2. It may also be notified that any private parties intending to pitch tentage facility in the ensuing Hornbill Festival are required to register with the Department of Tourism failing which legal action will be taken by the administration concerned.

Photocopy of Documents:

1. No Objection Certificate from Village Council/Chairman.
2. Residential Proof of the Landowner.
3. Residential Proof of the Campsite Manager.

For further queries may mail us at our official email id: nagalandtourism2014@gmail.com / +91-9863813283.

(AjanuoBelho)
Director, Tourism.

PELABA LEMSATEPER

Asür Teplok Amri (Changki)

04.11.1950 - 25.09-2021

Kechiyong asenok taküm lira, asenok Kibuba atema taküm alir, aser asenok süra, asenok Kibuba atema asür. Anungji asenok süaka mesüra taküm liaka, asenok Kibuba meyong.

-Rom 14: 8.

Onoki teti meima aliba Obala, asür **Teplok Amri**, pa iba akümüli nungi pila orr onok mangyim jashi nung alidang Indisen Baptist Arogo Dimapur, Indisen Village Council, kinungertem, medemertem, kiyongertem aser temolunger kwinakati ozü dang aria bilemja temeim sayuogo nenok ajak dang ozüi pelaba lemsateper. Shirnokisa ozü asükhü mapang yaritepogo, nenok ajak dang pelaba shisemer aser nenoki temeim sayuba ozüi kodanga mamadoktsü. Nenok mapa tajung asoshi kija shia taküm mojangma ta ozüi sarasademtsür.

-Temeim Kinungtsü, Chirnurtem, Semchirtem aser Anük-Apangtem



VACCINE-i KÜMZÜKER, VACCINE-I NOKDANGER

"Ni cancer nungi jenbor taküm ka. Ni vaccine dose anaprongla agiogo. Covid-19 vaccine ajem agir sülen temang nung timtem terar agütsüba dang nungi kanga agia tesashiba timtem ajangshidangogo. Kü temang nung immunity kanga dang tashimait aser tang äma Covid-19 tensa tamajungdang ni äser temeimertem kümzüka ayutsü asoshi vaccine agitsüba dak alaka tanga lenmang mali ta ni metet."

- Asangla Aying, Age : 78 yrs

"Asenoki mangatetba ajanga tsüba aser arendaka bilemer. Vaccine agiadokang. Iba tongbangrara akoktsü asoshi Vaccine ajem agitsüba dak alaka tanga lenmang mali. Asenok tekong meranga alitsüba mapang masü. Nibo vaccine anaprongla agiogo."

- Vekuto Curhah, Age-31yrs

"Temelenshi ka adokdaksütsü asoshi pei dak tuluka keta lir. Anungji iba wara madak takok angutsü asoshi asenoki shitak inyak tenzükdi. Ni Covid-19 vaccine dose tanabuba agitsü atadar."

- Angup Konyak, Age-45 yrs

"Ni frontline worker ka aser anogoshia ni mapai aor. Ibjagi, ni dang masü saka adianutem, kinungertem iba tashidak menatsusa lendongbangi ayir, koba ni asoshi kanga dang khuret tuluka, ajiasünung vaccine agiadokbajisa anisüngzük. Kidang tain (vaccine agitsü temsüa alirtem) ajak Covid ajem agiogo. Onok kümzüka alitsü atema dang masü saka kidang külemi alir tila tanurtem, shirnok vaccine magii lir, parnok iba wara lendongbang nungi kümzüka ayutsü mech onoki vaccine agi."

- Chongboi Singson, Age: 18 yrs

"Iba virus prokba ajemdaksütsü asoshi, kü teinyaktsü shilem inyakadoktsüla ta tebilemba nung ni vaccine agitsü lemtet. Covid vaccine ajem agir sülen, iba wara nungi ni kümzüka lir ta temolung süngzük. Anungji, iba wara prokba nokdangtsü aser iba wara koktettsü asoshi ajaki pei pei teinyaktsü shilem inyakatsü aser vaccine agitsü ta ni amanger."

- Kim, Age: 42yrs

"Ni arishi küm 18 lir aser ni vaccine dose anaprongla agiogo. Iba wara samatsütsü asoshi vaccine agitsüba dak alaka tanga lenmang mali, ajiasünung asenok ajaki vaccine agidi, vaccine agibaji tajangzük lir."

-Hoi, Age: 18 yrs

TAKE ALL RECOMMENDED DOSES OF YOUR COVID-19 VACCINE TO GET THE OPTIMUM LEVEL OF PROTECTION.

ALWAYS FOLLOW
PRECAUTIONARY
MEASURES



WEAR MASK

WASH HANDS

SOCIAL DISTANCE

STAY HOME

**NAGALAND
AGAINST
COVID-19**

Dial State Help line
No. 1800-345-0019/
National Toll Free - 1075
For any queries on
COVID-19 and other
health issues.

DEPARTMENT OF HEALTH
& FAMILY WELFARE
GOVERNMENT OF NAGALAND



FOLLOW US

Facebook: DHFWNagaland
Instagram: dhfw_nagaland | nhnagaland
Twitter: dhfw_nagaland
@NagalandVHM | @HealthNagaland

AFI-i NE nung saisapong ajungkettsütsü jangrar: Metha



Kohima, Mongputeni/October 02, 2021: Honibarnü, Heritage Kohima nung press conference ka agiba mapang AFI associate vice president Abu Metha aser NAA ketdangsürtem külemi tangokba noksa ka yangi angur.

Kohima, Mongputeni/October 02, 2021 (TYO): Northeast tešem nung, athletics tsütsü sempet tajung alir saisapongertem ngua, Athletics Federation of India (AFI)-i iba tešem (Northeast) nung athletics ajungkettsütsü asoshi tejangraba lemsatepogo, ta sangdong ajanga metetdaksü. "Linük nung, Northeast nung saisapongertem jenjang asadanga, iba tešem nung athletics tsütsü sempet tajung alir saisaponger aika lir. Ajsiüaka, resource, infrastructure aser support system tajung maliba ajanga, India nung athletic tsütsü tanünga tešemtem den medemdanga, Northeast nung saisaponger aikati athletic nung junga shilem magitetti lir," ta AFI indang associate vice president Abu Metha-i ashi.

Anungji, AFI-i Northeast nung athletics ajungkettsütsü asoshi tejangraba lir, ta pai ashi. 56buba National Cross Country Championship ayongzüksü asoshi Nagaland Athletic Association (NAA) indang bid agizükba osang sangoktsüba mapang, Abu Metha-i AFI indang sentong metetdaksü.

Metha, shiba NAA indang president lir, pai ashiba agi, iba sentong - '56buba National Cross Country Championship' ya sangküm January 15, 2022 nü Kohima nung ayongzüksü bilemdar.

Nagaland nung National Cross-Country championship ayongzükür sülen, AFI-i Northeast nung athletics ajungkettsütsü asoshi maparen tenzüksü, ta pai ashi.

Linük nung athlete tajungtiba den Nagaland nungi athlete temi iba sentong nung shilem agitsü asoshi maongka angutsü, ta Metha-i ashi.

Metha-i ashiba agi, iba asayamung atema bid asütsü onoki mepishiba pelashishia agizükba atema, NAA-i Chief Minister Neiphiu Rio tekolak ser achaayangba Nagaland Olympic Association aser Department of Youth Resources and Sports dang pelaba metetdaksür.

Iba asayamung tenzüksü lia, technical expert team kati Nagaland semdangtsü aser iba asayamung atema asalentong yanglutsü asoshi State indang technical team-i AFI ketdangsürtem den jembishinütsü, ta pai ashi.

Iba asayamung takok ngua agitsü asoshi, AFI, NAA aser State sorkar tsüngda sentong tem achaayangtsü. Anungji, iba asayamung takok angutsü asoshi saisapong meimer aser State Sorkar indang saisapong tentet ajak NAA mapatong nung nungitta yaritsü asoshi Metha-i ayongzük.

AFI kübok taoba mapang ayongba cross-country championship nung athlete 500 dak temai shilem agiogo aser taruba küm athlete timbai shilem agitsü imlar, ta pai ashi.

National championship magidang, State kübok district balala nung NAA-i cross country asayamung ayongzüksü, ta pai ashi.

District level nung school tanurtem, college nung azünger aser athlete tem atema cross country asayamung ayongtsü, kong teshimtet athlete temi State level championship nung shilem agitsü maongka angutsü. Iba nung takok angurtem Nagaland team tenüng nungi asayatsü.

National Championship nung shilem agitsü asoshi, mapang lia Nagaland team pur coaching agütsütsü, ta Metha-i shisem.

VINOO MANKAD TROPHY: Nagaland-i Mizoram kokogo

Dimapur, Mongputeni/October 02, 2021 (TYO): Honibarnü, JSCA Oval Ground, Ranchi nung Nagaland aser Mizoram tsüngda Vinoo Mankad Trophy asayaogo. Tzünglu aruba ajanga, iba match over 45 (team anaprongla) tashi dang asaya liasü.

Nagaland-i toss koka bowling asütsü shim. Nagaland team nungi bowler temi shilem tajung agiba ajanga over 31.4 nung Mizoram team-i run 84 dang yanglur sülen, asayar ajak out süadok.

Mizoram nungi opener Sahil Sharma (27 runs) aser Prem Layak (27 not out) nati junga asayaba dak alaka, tanünga batsman temi run aika meyanglutet.

Nagaland team nung Neizekho Rupreo-i wicket pungo tashi agia liasü. Külem tema nungi Khrievitso Kense-i wicket 3 aser Raja Swarnkar-i wicket 2 out sütsü.

Tanabuba innings nung, Nagaland team-i ayong ayonga dang over 20.5 nung iba asaya koktet. Team nungi batsman ka dang out asü.

Nagaland nungi Mughavi Sumi (42 not out) aser Yugandhar (31 not out) nati junga asaya aser tenati iba asaya takok angu.

Mizoram atema bowler Sahil Sharma-i wicket ka agi.

Sahil-i Neizekho (3 runs) out süja liasü. Tang, Plate Group - Table Point nung Nagaland tebur team temaba jenjang tongteta lir.

Maneni, Women's U-19 Trophy nung Nagaland aser J&K na asaya liasü.

Nagaland U-19 tetsür team-i toss makokba sülen parnok batting asütsü lemzüksü, kong Over 30.5 nung opener Iluneule Zeliangi run 22 aser Bipila-i run 32 yanglua liasü. Team atema tena sentepa run 70 bendenloktsü.

Ajsiüaka, over 40 sülen, Nagaland wicket atonga tukadok aser over 50 nung parnoki run 119 yangluteta wicket 6 shi out süadok.

Tanabuba innings nung, Nagaland team nungi Priyanka Karmakar-i yakta dang J&K opener Lalita (1 run) out sütsü. Bawandeep Kaur (20 runs) aser Rudrakshi Chib (captain) - (46 runs) nati meranga asaya.

Nagaland nungi Soyimkümla-i Kaur aser Vanshika (0 runs) out sütsü. J&K Captain, Chib-i junga asaya liasü, saka Pausamyile Hegui-i la out sütsüba ajanga lai half century metongtet.

Pausamyile Hegui-i over 8 nung J&K team nem run 12 dang agütsü. Ajsiüaka, Sadiya Wani (21 runs not out) teyari ajanga, J&K team-i over 33.2 nung wicket 5 agi iba asaya koktet.

* TARUBA ASAYATEM:

VINOO MANKAD TROPHY: NAGALAND VS ARUNACHAL ON 4TH OCT. 2021 09:00 IST, at MECON Stadium, Ranchi
WOMENS U-19 ONE DAY TROPHY: NAGALAND VS SIKKIM ON 03 October 2021, 09:00 IST, at KIIT Cricket Stadium, Bhubaneswar

KTC Football Referee Clinic tembangogo

Kohima, Mongputeni/October 02, 2021 (TYO): Kohima Town Club (KTC) ajanga anogo pungo tashi ayongba Football Referee Clinic sentong ya Honibarnü, Indra Gandhi stadium Kohima nung tembangogo, ta sangdong ajanga metetdaksü.

Iba clinic sentong nung, All India Football Federation (AIFF) referee instructor, Manipur nungi Joy Chandra Singh aser national referee Priyobarta nati training agüja liasü. Iba training nung, Kohima, Dimapur, Phek aser Kiphire nungi tetsür 4 densemanisung 28 agi shilem agiogo.

KTC, President, Dr. Viketoulie Pienyü-i, iba wadang maneni tejakleni bener aotsü asoshi football referee clinic nung dang temolung agütsür meinyaktsüla. Iba ya tetenzükür

ka dang, nenoki dang ano meranga inyakra iba sempet amshia taküm jangratema litettsü akok, ta ashi.

2018 küm, iba club ajanga mezüng football referee clinic ayonga agiba sülen, training agir referee asem tashi Referee Identification Number (RIN) nguogo, ta pai metetdaksü.

"Iba clinic nung angazükba ajak mapa küma inyaktsü merangang aser kokrabang pei aliba tešem nung football match tem ayonga asayatsü merangang," ta Peinyü-i ashi.

Anogo pungo tashi ayonga agiba referee clinic training ya Mongolbarnü tenzüka liasü. Iba training lapokba sentong nung Z Kire, IPS, Rtd DGP Nagaland aser iba Club indang Adviser alakteta tejaoker ama aruagi denogo, ta kasa sangdong ajanga metetdaksü.

Imnatiba-i Badminton training camp tenzüksü



Changtongya, October 2, 2021: Saisabong nung temulung agütsüji kanga tongtibang aser Naga nunger dak tangar bendanger den toktepa asayatetsü sempet lir ta Imnatiba, Advisor, Industries & Commerce, Labour & Employment, Skills Development & Entrepreneurship, Govt. of Nagaland ajanga "4 Days Badminton Training

Camp" Multi- Purpose Hall, Changtongya nung lapoktsüba sentong nung shia liasü.

Paisa saisabong ajanga taküm rangpen anema aliba nung yarir aser taküm nung tepela tesünep agütsür ta shisem.

Iba sentong ya Imnatiba, Advisor-i yaria Youth Organisation NDPP ajanga achaayanga ayongzük aser asaya sayutsü asoshi Head

Coach Joseph Sumi, Badminton World Federation certified coach aser Assistant Coach Nochet Jamir, Khelo India Coach Mokochung lir. Iba sentong T. Anen Lemturi lemsa aser Imtimatsung, Pastor Changtongya Yimsen Baptist Church-i sarasademer Kilangnukshi, General Secretary Youth Organisation NDPP ajanga pela agizükba o jembia liasü.

BILEMDANGANG

"Tangari molungba nung kodang jajadir, pei molungtettsü makar."